


www.diarioaruba.com
The way business moves!
DIARIO
Online
 E Matutino di Aruba

Cos no ta manera nan tabata den pasado

Bo mester ta un persona di mey siglo di edad, of mas, pa comenta cu **"cos no ta manera nan tabata den pasado"**.

E dianan aki tin problema di T-shirt y poloshirt pa school y por tende di e calidad cu nan tin, y atrobe mustrandu riba **"cos no ta manera nan tabata den pasado"**.

Mi ta corda cu tempo cu nos tabata compra marca **"Fu-Ge,"** tabata ser bisa cu ta marca barata, pero e calidad tabata halto.

Fruit of the loom cu a bin despues, tabata **"e marca barata"** y kico a pasa?

Nan a bira un di e marcanan caro, considera como producto di **"Marca"**.

Mi por imagina e desapunto cerca mayornan di uniform cu ta krump, perde color, rek, of di stitchnan cu ta habri y cu a prefera esnan di nan Emco.

Personalmente pa carnaval y varios otro evento, semper mi a prefera Emco tambe, pa motibo di calidad y mi no tin motibo di cambia tampoco.

Di refresco mi ta corda con dushi un Oso Grape tabata, un Coco Rico, un Pepsi Cola, un Nesbitt's, y un Coca Cola.

Awe mi no por bisa mescos di ningun di nan.

Ningun pa mi ta ni mitar di loke nan tabata.

Nan a bira mucho awa, poco gas, sucu cu parce artificial, sin smaak, y toch nan ta mihor cu e otro nan cu tin riba mercado y nos tin cu keda cu nan.

FRUTA Y VERDURA FRESCO

Tira un bista riba nos fruta y verduranan.

Nan tambe a bay atras masha hopi y ta bini con cu ta, y ta bende, pasobra ta un necesidad.

Peernan ta bin sin smaak y color cu parce cu nan a drumi den lodo, y nan ta seco seco. Apelman a bira fruta pa solamente esnan cu diente di hero. Hende cu diente debil sigur lo no sa kico ta un dentista, pasobra e apel mes ta ranke pa nan.

Ademas, nan tambe a bira seco y sin smaak.

Por haya na supermercadonan mispel cu ABBA por usa pa campeonato di baseball. Mescos ta pa e plumnan cu bo ta haya awendia.

Eseyan ta bon pa usa como bala di golf di color biña of cora.

Bacobanan, hasta esnan cu nan etiketa di **"marca,"** no ta para banda di e **"Dole"** y otro nan di antes.

Nan tambe ta sin smaak y seco.

Ta bon cu tin ainda algun hende local cu ta entrega bacoba crioyo of bacoba arubano na supermercadonan, cu bo ta come un bacoba dushi "di nos mes".

Esaki ta conta tambe pa patia crioyo, of patia arubano.

E patianan importa di awe ta seco, parce cu nan a wordo muha cu awa braak, y ora habri nan, nan ta basha den otro y smaak manera patia yena cu hariña.

Di tomati no papia mes.

Un tempo tabata haya tomati bunita, grandi, cora of medio cora cu tabata di lo mihor. Hasta tempo cu Aruba tabata tin su **"Hidroponics"** Aruba tabata tin tomati di mihor calidad di mundo.

Awe ta haya tomati cu ta bon pa hunga cricket cu nan.

Esnan cora grandi, ta seco y basha den otro asina cu habri nan, of nan ta dañá den poco dia.

Ora bo kere cu bo tin tomati hecho, fresco y cla pa usa, ta resulta cu paden ta tur putri. Tin di e tomatinan chiquito cu ta pela di nan mes, mescos cu siboyonan cu ta haya awendia.

Ora bo kier kita casca di siboyo, bo a perde mitar di e siboyo, pasobra tur ta kita hunto, y den un hala nan ta putri tambe.

Promenton tampoco ta wanta mas.

Nan tambe ta haya **"cancer"** den poco dia y muri den bari di sushi.

Esaki ta conta pa awacati tambe.

Awacati tambe ta putri na momento cu bo ta kere cu nan ta berde y duro.

Ora habri nan, color geel a bira color di calichi.

Lechuga tambe a bira mescos.

Bo ta compra un lechuga, usa esaki un biaha y ya e ta cla pa baki di sushi, pasobra e ta bira cameleon mes ora.

Asina por sigui cu verduranan. (tin mas di verdura pero pa otro biaha)

CARNI A BIRA WEGA SIN CONTROL

E carni cu nos ta compra awe a bira manera un wega sin control.

Tin supermercado caminda ta parce cu e carni tin un luna den vitrina, pasobra color a bira hasta biña.

Tin supermercado caminda bo ta tende: **"no tuma esey, e ta bieul!"** toch e ta den vitrina friando pa wordo bendi.

Mi no ta experto di nada di carni, pero conocedonan cu mi conoce, a mustrami na varios supermercado riba e manera **"malo di corta carni"**, locual ta afecta tambe su preparacion.

Despues bo ta bin haya sa cu esnan cu ta traha **"patras"** cu carni, no ta carnicero.

Pero no tin control riba esaki tampoco riba nos isla.

Bo ta haya carni awe cu ta krump; bira tire di bulldozer; cu ta hole durante preparacion, pero e paki cu bo a habri ta parce paki di carni **"fresco fresco"**.

Ta despues bo ta tende cuanto **"hangua di sanger vitaminiza"** el a haya y cuanto gallon di verf a ser tira riba dje.

Pisca fresco a bira **"pisca fresco di algun siman pasa"**.

Bo ta ripara con nan color ta cambia bira scur.

Tin ora nan ta dobla den seconde, minuut y ora, pa despues manda **"pata"** den laira manera cacho morto riba caya.

Ta resulta cu nan ta "fossiel di pisca di siglo bieul" cu a wordo rebiba pa aparenta fresco di awe. Cu filet ta peor ainda.

Eseyan ta **"saca pata"** cu bo ta kere cu ta inktvis nan ta y ta krump, lora curpa como si fuera nan ta sufri di **"cala calor"** pa no bisa **"calafrieu"**. (riba carni mi ta bolbe despues)

TA NA ARUBA NOS TA TOCH?

Awe y e dianan venidero, mi ta wordo zundra pa loco pa locual mi a skirbi aki.

Esaki pa motibo cu ta e **"veteranonan di edad"** manera mi edad, lo por dunami razon, pero e veteranonan di ultimo 20 pa 30 aña, a haya nan ta biba cu e articulonan menciona, sin sa con bon esakinan tabata prome cu esey.

Pa nan tur cos ta normal y bon.

Na cas ora cu mama, papa, welita of welito reclama, nan lo comenta sigur: **"boso ta pensa di tempo di cauchi baulo, keriendo atrobe cu ta mihor cu nos tempo moderno"**.

Berdad ta cu ora cana den supermercadonan, y mira kico tin awe di e surtido amplio, hende lo no cay ariba e parti negativo, pasobra tur cos

ta muestra asina bunita y fresco. Bebidanan ta muestra asina dushi den nan paki, botter of bleki atractivo, cu bo ta na mira e pafu y lubida loke tin den dje y con e ta smaak.

Hasta juicenan a perde nan sabor.

Loke ta juice puro, pero puro, por pasa ainda, pero loke ta **"juice puro"** y bo lesa tur kico tin den dje, e puro a bira quimico mesora.

E ora ey ta mihor bo compra bo propio fruta y pasa nan den machine na cas pa traha bo juice puro.

Pero kende ta keha? Ta mi so ta keha?

Ningun hende ta keha na gobernantenan y departamentonan relaciona cu salubridad?

No. Ta ami so ta keha, pa e fastioso cu mi ta.

Ta mi so ta keha pasobra mi ta frustra. Ta mi so ta keha pasobra mi kier cos pa piki ariba.

Y tur locual mi a skirbi aki riba **"no ta verdad"**. Mi ta gaña. Mi no ta skirbi berdad. Mi ta un hipocrita cu ta compra tur e cosnan aki toch, pasobra asina nos ta na Aruba.

Nos ta guli manda abao. Nos ta keda cu nos boca cera, y riba tur cos: **"Nos tin AZV pa cubri nos gastonan di docter y hospital y no tin cu preocupa pa cos chiquito"**.

July Naar